

Oslin Trimon celebrando 30 aña den Farandula



Oslin Trimon, a nacena Aruba dia 26 di Oktober 1970 y ta yiu di Sixta Trimon-Britten y Marco Trimon (q.e.p.d.) y ta e mas chikito di un famia di 7 ruman. Na un edad hopi hoben Oslin a cuminza mostra talento den e ramo musical pa asina despues e cuminza desenvolve su mes den e ramo musical/cultural. Na un edad di apenas 7 aña ya Oslin tabata canta na diferente shownan tanto Cultural y tambe Mexicano. Oslin a haya su formacion musical basico cerca sra. Maybeline Arends-Croes. Cu sra. Maybeline y coro Tutifruti Oslin a duna diferente presentacion rond Aruba. Despues cu un tiki experiencia den e ramo musical, Oslin a dicidi di participa den su prome festival infantil Mexicano. Den dicho festival Oslin a canta cu Mariachi Aruba. Apesar cu e biaha ey Oslin no a gana ningun premio, esaki tabata e comienzo di un carera musical sumamente exitoso.

Na edad di 9 aña ya Oslin tabata viaha regularmente pa Curaçao pa presenta den diferente show ey nan.

Na Aruba Oslin apesar di tabata hopi jong, tabata presenta tur diahuebs den e tan famoso Cocktail Party den e tempo ey Caribbean Hotel, awendia Radisson Hotel. Asina Oslin a sigui poco poco pero cu pasonan firme den e genero musical. Na edad di 14 aña Oslin a

cuminza studia trompet cu e 2 mihor maestronan na Aruba, esta George Viguir y Franklin Granadillo. No a dura mucho cu Oslin a sa di demostra cu como trompetista tambe e tin hopi calidad.

Asina tambe Oslin na diferente ocasion a wordo selecciona pa forma parti di "Aruba All Stars Band" cual banda tabata ser forma pa toca na ocasionnan special y ta consisti di e mihor musiconan local. Otro gruponan cu Oslin a toca ta: La Nueva Fuerza, Papito y su doble Sabor, Pride, Aruban Band, Orquesta Harmonico Arubano, tambe Oslin a yega di toca cu practicamente tur mariachi na Aruba.

Loke ta resalta ta cu Oslin for di comienzo di su carera como cantante y musico, nunca a para keto, te cu dia di awe e ta activo den diferente ramo musical, esaki ta unico, como cu hopi artista/musico sa tuma cierto pausa den nan carera.

Oslin tambe banda di ta cantante y trompetista, tambe ta domina un cantidad di otro instrumentonan.

Oslin tin asina hopi festivalnan riba su nomber cu ta bira mucho hopi pa menciona tur, pero algun di nan cu no por keda sin menciona ta:

Oslin ta bay den historia Cultural di Aruba como e prome hoben cu na edad di 13 aña a gana e festival

grandi di Dande.

Na e mesun aña e ta gana tambe e festival grandi di Dande di e bario di Noord, como si fuera poco tambe e mesun aña Oslin ta bolbe bay den historia como Aruba su prome Rey di Tumba Infantil, cual titulo Oslin a retene algun biaha. Tambe Oslin tin riba su nomber e prome festival di cancion na papiamento, den cual festival e mihor cantantenan di Aruba a participa, aki Oslin ta bira ganador absoluto cu e cancion "Juan del Diablo" di Jossy Brokke jr.

Oslin tin tambe un sin fin di titulonnan di festivalnan cu el'a konkista den e genero Mexicano, cualnan ta mucho pa menciona. Pa loke ta e ramo Cultural Oslin for di 14 aña tabata toca tur siman den diferente hotel den shownan cultural, e tempo ey Oslin tabata forma parti di Tipico Placentero. Segun e añanan a bay ta pasando mirando e necesidad Oslin a funda e prome grupo Tipico Infantil/Hubenil den historia Cultural di Aruba, e grupo aki Oslin a yama "Tipico Hubenil Tanki Leendert" e meta di Oslin tabata e tempo ey pa purba stimula nos hobennan den e ramo Cultural, esaki door cu poco poco por a mira cu e influencia di otro tipo di musica tabata formando un peliger pa nos Cultura Musical. E impacto di e grupo aki tabata asina grandi cu diferente dirigentenan den bario y centro di barionan a tuma e idea aki over y tambe a cuminza nan mesun grupo. Awendia tin mas cu 15 gruponan tipico infantil-hubenil na Aruba, hasta cu tur fin di aña por mira nan activo por ehempel den e festival di Dande infantil na Tanki Leendert. Pues e meta di Oslin a wordo logra.

Na aña 2002 Oslin ta muda pa Hulanda, y naturalmente na Hulanda tambe Oslin a sigui activo, na madre patria Oslin a funda Tipico Herencia Cultural y a sigui cu e mesun ideologia di promove lo mas cu por nos musica Cultural.



Na Hulanda Oslin a ricibi den un corto tempo 2 reconocimiento pa su trabaonan, uno di vereniging CAR, como Arubiano cu a destaca y tambe 2 aña pasa e famoso Festival "Aruvision" a wordo dedica na su persona como agradecimiento pa tur loke el'a bin ta haci durante e añanan den e ramo Musical/Cultural. Na Europa Oslin a realiza diferente grabacion. Tambe Oslin ta presenta regularmente rond Hulanda, Belgica, Alemania y recien tambe e tabata na sur di Francia. Semper y unda cu Oslin presenta e ta presenta su mes como Arubiano y ta papia di Aruba, pa asina esnan presente tende maske ta un tiki di Aruba, y di unda cu e ta bin. E aña aki Oslin ta cumpli 30 aña den musica y farandula, un fecha cu sin duda no por laga pasa bay sin mas. Oslin Lo celebra esaki en grande dia di mama den City 1 na Aruba hunto cu diferente cantante local

cu trayectoria largo, manera Imelda Rustveld, Bubu "El General Bislik", Bertha wolff, Abel Henriquez, Vivian Kock, Ricardo Croes, Francis Jacobs, y hopi otro mas. Tambe Mariachi Nacional lo tey. Ta un orguyo di por meciona cu nada menos cu nos tata di Cultura, Padu del Caribe lo tey interpretando su cancionnan immortal. Logicamente cu nos mama di Cultura no por keda afo, Bernadina Grovell lo tey den un show espectacular hunto cu Sodo y Cuero. Pa cera e show lo tey den su regreso triunfal for di madre patria, Oslin Trimon. Oslin lo tey despues di un ausencia grandi pa un solo presentacion, especialmente dedica na tur nos mamanan. Oslin lo wordo compañía pa Mariachi perla di Aruba. Pues waak bo no perde e show aki. Un show cu un prijs pa un y tur, den un ambiente informal, y cu musica Cultural/Mexicano.

